

Hebreos

Porrosht shuu Deyjit tatim òr lahwoso.

1 ¹Antkite hn Porrosht tatim lahwoso erze profeta poruwo wishì par uje shuu otatim eyok poruwo wishì. Wichì shish tatim erze profeta poruwo wishì hn shuu oshiyokòr kuche ich kihniya par uje siteèta kuche par uje sehe duhu eyok poruwo wishì odìraha. ²Per ele ahle Porrosht shuu Deyjit tatim eyok lahwoso par uje shuu yiraha. Porrosht wichì uje shuu Deyjit shiyokòr irmòkite, hn chiihla ire hn nos ishim ire wir kuche. ³Uje oso oteychim Cristo ich ochiraha Porrosht ir iluu pork ir iluu shi itso Cristo ir iluu. Cristo itsship ir Deych. Cristo wichì uje nos tibey kuche chìra lahwoso hn chìra lakirbo. Uje Cristo ishi eyok hnitewkite ich sakaha Porrosht waächta wahacha poòrc pork wichì ich dich. ⁴Porrosht Ijìt ma ukurbo deyo de je erze ir anjele hn ir ibiyo ich ma deyo je erze ir anjele òr ibiyo.

⁵Porrosht yelij tatim erze anjele yeèk il: —Owa yok pijo. Ele ahle tuu owa shùrha.— Hn yelij tatim erze anjele yeèk duhu ilorz: —Yok uu eych hn owa uu pijit.— ⁶Uje shuu Deyjit webich osht shurèhe nàhu irmòkite hn Porrosht tata im: —Sehe tuu nos wir yok anjele oteychàha ese Pijit.— ⁷Porrosht tata uje shuu erze ir anjele ochisàha ire myentita. Erze Porrosht anjele wir ir ibiyo. Shuu ochisàha ire jwekita. ⁸Per Porrosht tatim Deyjit im:

—Owa Porrosht hn owa rey uje shish de. Owa uje abey paabo hn shish ahakòr uje ich om. ⁹Ahmùr uje oso oshiyokòr uje ich om, per etak erze uje oshiyokòr uje ich mihnúwo. Yok uu owa Porrosht. Ahmùr uje ich om heke tuu owa ma ayla je owa ahìro.— ¹⁰Hn tatim Deyjit im: —Owa uu nos oso hn nos wir kuche ir yinsirc. Tenitkite hn ahakòr ìrmo hn ahakòr nos wir kuche uje de poòrc èra ahme. ¹¹Deeych yet nehe hn nos sìhna ire per owa shish owa de. Ese hnimich hn poòrc wir shi itso òr ishuwo uje saraàshi ire ìlaro nehech sìhna ire nehe. ¹²Wir shi itso uje yeèk iim lasuwo ìlaro hn iyàha lasuwo ahlo per owa ye kinàhape, shish itsye. Yelij ehna owa.—

¹³Porrosht yelij tatim erze ir anjele yeèk il: —Akaha paächta nehech nos terz owa amàho hn tibite òr ahme— per tatim Cristo shuu itsorz.

¹⁴Nos wir Porrosht ir anjele wir shi òr ichibiyo. Porrosht shuu oshiyokõr debiyo otakashim erze uje otîr poõrc nehe.

Ye ompe uje otata uje ye jukur uje Cristo tooho òrkite.

2 ¹Heke titim olak. Tyenij yêrlopa hn yiyokõrlo uje Cristo tata par uje ye yukwimlo erze ahwoso uje ich ùru. ²Porrosht tatim ir anjele par shuu otatim Moisés lahwoskite par tatim oso. Erze ahwoso ich ùru heke erze oso uje ye onahmür oniyokõr erze Porrosht ahwoso uje anjele otatim òr ich oshi labahat pork oshiyokõr uje ich mihnüwo. ³Kimiji yotiis uje Jesús tata uje ishi eyok hnitewihi Porrosht ahirkite ¿yuhu inaapo par uje eyok yuhwoho Porrosht ir hme par ye depyêr eyok? Wap eyok írhihich tatim oso shuu itsorz hn erze uje otêr ire otatim òryok. ⁴Porrosht shuu oshiyokõr kuche uje ye latik pwele shiyokõr uje shuu oso ochishlabe par shuu ochiraha uje òr ahwoso ich ùru. Ich shuu imeheeych toy uje òr ahwoso ich ùru pork Porrosht ichibich ishîm Porrosht aabo òr eyuwo kinâho kinâho par uje sehe duhu oniyokõr ir ibiyo kinâho kinâho.

⁵Porrosht ye dibite erze anjele òr hmepe ese írmo uje tyenij shiyokõr nehe uje oyitim olakike hn nos wir kushjâro par uje otibey. ⁶Porrosht ahwoso tata uje yeêk tatim Porrosht im:

—¿Inaapo heke shish uhu eyuwo tisîr oso? ¿Inaapo heke sehe akashim òr? ⁷Owa uhu erze anjele ma òr ukurbosh je ese hnakîrbich uje iich otsii Adán per uhu ire dich ⁸pork nos ebite erze kuche Adán ir hme.—

Uje Porrosht nos chibite erze kuche ír hme shuu itsorz ich chibite ire par nos tibey erze kuche, per ele ahle ich imeheeych uje ye oso otibey erze kuchepe. ⁹Per eyok eyucha Jesús. Porrosht nos sahmür oso heke shuu Jesús ír ukurbo itso oso òr ukurbo, ye ilo erze anjele òr ukurbope. Uje oso oshuu ire oshuu toy ich shuu Jesús dichpa pork wichi tooho osokite. ¹⁰Nos wir kuche uje Porrosht shiyokõrkite wir par ire. Ich om uje shuu Cristo ewenta erze uje oso oshiyokõrîhi ire nehech oshuu oshuu toy par ishi oso òr hnitewihi Porrosht ahîr. Heke ich ompa uje Cristo shuu okîhniya omasaha par Porrosht aabo. ¹¹Cristo wichi uje shuu eyok Porrosht aabo. Cristo ír Deych wichi Porrosht hn wichi eyok Deych toy, heke Cristo ye poym eyok uje chii eyok leshîboho. ¹²Porrosht ahwoso tata uje Cristo tatim Deych im: —Titim pishîbo owa eluu. Uje otakîsho lawich par oteychâha owa ich yok de òr ahîr toy hn tîkeeychi teêt imno tîkeeychâha owa.— ¹³Porrosht ahwoso tatpo im: —Cristo tatim Deych im: “Ye tokotiis owape.”— Hn Porrosht ahwoso tata im: —Cristo tatim Deych im: “Yok de lika hõr wir aabo uje asim yokni.”— ¹⁴Eyok ëro de hn eyok armista de heke Cristo ír ëro de hn ír armista de toy par uje pwele tooho krus eeych. Uje tokite ich sihna ese dyablo ír ukurbo uje shuu oso otoy. ¹⁵Nos wir oso shish otola uje otoy per Cristo tooho òrkite par uje ye duhu otolape uje otoy. ¹⁶Ich ùru uje ye tirêt petîkni par sosîr

erze anjele. Shi tirēt par uje sosir erze uje otāra Abraham, hn erze uje ye lotiis Porrosht shi ōr itso Abraham uje ye lotiispe ¹⁷heke shuu Cristo hnakirappa itso erze uje otāra Abraham par uje chuuna uje oso ōr losuhlaabo. Heke ire masaha par Porrosht ibik uje iich otsii saserdote uje sosir oso hn shish shiyokōr Porrosht ibiyo par uje ishi oso ōr hnitewihi Porrosht ahir. ¹⁸Cristo ewenta uje oso sehe oduhu niyokōr uje mihnūwo heke ele ahle pwele takashim erze uje yewo sehe oduhu oniyokōr uje mihnūwo.

Cristo wichi ma dich je Moisés.

3 ¹Pishibo watsaklo, olak uje olak Porrosht aabo, wichi chihla olak par ahakōrlo uje ire sahmūr. Sehe tuu olak eyucha Jesús. Porrosht shuu tirētkite hn shuu wichi saserdote par uje shish takashim eyok uje ye yotiislo irpe. ²Porrosht chihla Moiseskite hn wichi nos shiyokōr erze obiyo uje ishim ire uje de erze israel oso ōr ahir. Erze israel oso wir shi itso Porrosht ihyuch. Porrosht chihla Jesús toy hn wichi nos shiyokōr ir ibiyo shi itso Moisés. ³Per Jesús wichi ma dich je Moisés shi itso ese hnakirbich uje shiyokōr pwertit wichi ma bale je ese pwertit. ⁴Nos wir pwerto uje de shish yeēk de uje shiyokōr, per Porrosht wichi uje nos shiyokōr erze kuche. ⁵Moisés shish shiyokōr uje Porrosht tatim ire. Shiyokorāha erze israel oso uje ōr itso Porrosht ihyuch. Moisés wichi Porrosht ibik uje tatim oso erze kuche uje Porrosht tatim ire uje tyenij shuu tokole nehe. ⁶Cristo shish shiyokōr uje Porrosht tatim ire toy. Shiyokorāha erze oso toy uje ōr itso Porrosht ihyuch, per wichi uu Porrosht Ijīt pisht, ye ilo Moisespe uje shi Porrosht ibik. Eyok Porrosht ir ihyuch uje ye yotiislo Cristo hn yitim oso uje eyok owich de Porrosht ahir.

Porrosht aabo ōr owich de par otsakaha.

⁷Titim olak uje Porrosht ahwoso tata uje ir Ichibich tatim oso im: —Ele ahle uje ēntlo uje Porrosht tata ⁸ye uhu olak hu kata ilo erze israel oso uje ye onahmūr otēr uje Porrosht tatim ōrkite. Wir otsepi Porrosht uje odechi ese hnimich uje isa.— ⁹Hn Porrosht tata im: —Olak poruwo wishi omo erze kuche uje tiyokōr nehech kwarenta āyo uje ode wahacha ese hnimich uje isakite per shish otsepi yok. ¹⁰Heke erze israel oso oshuu tiispulo. Tiita uje erze oso ich shish ōr hu kata. Shi sehe oniyokōr uje ōr ire otsahmūr. Ye odiraha piluupe. ¹¹Heke towāha ōr par uje ye tokosim ōr ese hnimich par otsakaha uje tibite pahwoskite par tokosim erze uje otāra Abraham.—

¹²Pishibo watsaklo, abeylship olak par uje ye olak yeēk duhu deyuwo mihnūwo hn lotiis uje Porrosht tata hn iim Porrosht uje ika. ¹³Per kal deeych shish tyenij akitleye nehech terihi uhurc par uje nīhyok olak yeēk

shuu erze kuche mihnūwo yakaha ire. ¹⁴Kimiji ye yotiislo Cristo nehech terihi uhurc ich eyok owich de Porrosht ahir. ¹⁵Porrosht ahwoso tata shuu itsorz: —Ele ahle uje ěrlo uje Porrosht tata ye uhu olak hu kata ilo erze israel oso uje oshuu dehe katakite.— ¹⁶Olak eyucha erze uje ochunt Porrosht ahwoskite hn oshuu dehe kata. Nos wir israel oso uje Moisés chiyuhu orĭhi erze egipto oso ĩr hnimichkite wir uje oshuu dehe kata. ¹⁷Olak eyucha erze uje Porrosht sowāha ĩrkite nehech terihi kwarenta āyo. Wir shi erze israel oso uje oshiyokōr uje ich mihnūwo. Wir otooho ese hnimichkite uje isa. ¹⁸Olak eyucha erze uje Porrosht chibite lahwoso par uje ye dosim ĩrpe ese hnimich par olebuhu. Wir shi erze uje ye oniyokōrpe uje ire sahmūr. ¹⁹Ich imeheeych uje ye ĩr pwele omasaha ese hnimichpe pork otsotiis Porroshtkite.

4 ¹Heke titim olak erze Porrosht ahwoso uje chibitkite par uje otsakaha itso uje ire sakaha pork yahpaa dihyerupe. Abeylship olak. Heke uje terihi ese uhurc nehe ich nihyok ye olak yeĕk nihyokĭhi ese owichpe. ²Otatim eyok erze ahwoso uje ich om shi itso uje otatim eyok poruwo wishkite per par ĩr ire ich ye jukur pork otsotiis. ³Per eyok uje ye yotiispe uje otatim eyok ich eyok owich de Porrosht ahir uje ire sakaha. Porrosht ahwoso tata uje ire chibite lahwoso im: —Towāha ĩr heke tibite pahwoso par uje ye tuu omasahape ese owich uje yok tiyakaha.— Uje Porrosht chimĭt uje shiyokōr ĩrmōkite ich chimĭt toy ese owich par uje otsakaha. ⁴Porrosht ahwoso tata im: —Uje terihi deeych syetekite ich Porrosht sakir pork nos chimĭt debiyo.— Heke ich imeheeych uje owich de par uje otsakir. ⁵Hn Porrosht ahwoso tata toy im: —Ye tuu wir omasahape ese owich uje yok tiyakaha.— ⁶Erze oso webich oso uje ochunt erze ahwoso uje ich om ich ye omasahape pork ye oniyokōrpe uje Porrosht sahmūr heke shish owich dechi par yewo omasaha. ⁷Porrosht chibite uje deeych yet nehe hn yewo omasaha ese owich pork osdeyo uje ye omasaha petikkite heke shuu David chichew lahwoso im: —Ele ahle uje ěntlo uje Porrosht tata ich ye uhu olak hu kata.— Ese deeych yet nehe uje tatni wichi ele ahle. ⁸Josué hnoy erze israel oso seya ĩr Canaankite. Canaan ye wichi owichpe uje Porrosht sakaha heke tatim David uje deeych yet nehe hn omasaha ese owich uje ire sakaha. ⁹Heke shish owich de par erze uje ye olotiis Porroshtpe par uje otsakaha ¹⁰pork uje yeĕk masaha ese owich uje Porrosht sakaha ich iim debiyo shi itso Porrosht uje iim debiyo. ¹¹Heke tyenij yiyuhulo eyok par uje yomsahalo ese owich hn yiyakahalo par uje nihyok eyok yeĕk ilo erze uje ye oniyokōrpe uje Porrosht tata heke ye omasahape. ¹²Porrosht ahwoso ikĭrĭt de hn chish obiyoho ĩr aho. Wichi shi itso kiskirehet uje ich watakpa. Ma watak je espada uje otsata pit hn pit yet heke wichi nos chibite ĩr iluu orhōta hn chibite orhōta toy erze uje de ĩr eyuwo shi itso uje sehek yeĕk eheth hn shuu ĩr ikĭrĭt tĭr pit hn ĩr ichibich tĭr pit yet, hn sehek lebiyo par uje ye

duhu lakaha lalerzpe, hn sehekpo ese uje de lebiyo eheth. Heke chibite eyok eyuwo hn iluu orhōta. ¹³Porrosht nos shiyokōr wir kuche heke ich nīhyok ye latik pwele uje sakis ire. Nos imeheeychihī Porrosht ile ikich. Deeych yet nehe hn nos tyenij yitīr Porrosht ile ikich hn yitim ire uje yiyokōrlo.

Jesús wichi Porrosht ibik uje iich otsii saserdote pisht.

¹⁴Titim olak uje eyok saserdote de uje ich dichpa. Hno tīr poōrkzite. Wichi Jesús uu Porrosht Ijīt pisht. Heke shish tyenij ye yotiislo ire hn yitimlo oso yewo toy. ¹⁵Eyok saserdote chuuna uje ye eyok ukūrbirsh hn takashim eyok pork uje ehn wichi de irmōkite ich sehe oduhu niyokōr uje mīhnūwo shi itso uje sehe oduhu yiyokōrlo uje mīhnūwo toy per wichi yelij niyokōr uje mīhnik. ¹⁶Heke ye yitila uje yapur Porrosht erze kuche uje eyok nesita. Tyenij yiyokōr yuhu itso uje yitīr Porrosht ile ikich uje sakaha debita eeych. Wichi chuuna uje eyok losuhlaabo heke uje eyok nesita kuche ich takashim eyok.

5 ¹Porrosht chiihla erze israel oso nohmīr nohmīr uje ōr hnakirbo par omasaha par ir ibiyo uje iich otsii saserdote bahlut pisht. Wichi uje hnoy erze kuche uje oso oshimihī Porrosht, hn ishim Porrosht erze loshīpo uje oshuu par erze kuche mīhnūwo uje ōr ire oshiyokōr par uje Porrosht perdonar ōr. ²Ye ir ukūrbirsh pork shi hnakirap itso erze oso yewo hn shiyokōr mīhnūwo itso ōr heke pwele hnetā erze uje ye odīraha uje mīhnik hn shi oshiyokōr hn erze uje onāha. ³Ese uje ir ibiyo iich otsii saserdote shi hnakirap heke tyenij shuu loshīpit toy par ishim Porrosht par erze kuche mīhnūwo uje shiyokōr par Porrosht perdonar ire shi itso uje ishim Porrosht par erze oso yewo toy. ⁴Ye latik dībite ire par masaha hn shiyokōr erze obiyo uje iich otsii saserdote. Shi Porrosht wichi uje pwele chiihla yeēk par saserdote shi itso uje chiihla Aaronkite. ⁵Cristo itspo, ye dībite irpe par saserdote uje ich dichpa. Shi Porrosht wichi uje chiihla ire hn tatim im: —Owa uu yok Pijit. Ele ahle tuu amsaha par ahakōr pībiyo heke tuu owa shūrha.— ⁶Porrosht ahwoso tatehe owich yetpo shuu itsorz: —Porrosht im: “Owa saserdote uje yelij ehna owa. Shi owa saserdote itso Melquisedec.”— ⁷Uje ehn Cristo de nāhu irmōkite ich orar sapur Porrosht ich sihnew. Ich yerh uje sapur Porrosht pork chiraha uje wichi ukurbo de par takashim ire kimijī nahmūr par uje ye tope. Wichi tola Porrosht heke Porrosht tēr ire. ⁸Jesús wichi Porrosht Ijīt pisht per uje oshiyokōr mīhnikihī ire ich ewenta hn shish shiyokōr uje Porrosht sahmūr ⁹hn yelij niyokōr uje mīhnik heke shi ire nohmīra uje ishim ikirīt uje yelij nihna ire erze uje oshiyokōr uje ire tata. ¹⁰Porrosht chiihla wichi par saserdote uje ich dichpa shi itso Melquisedec.

¹¹Kuche de ich kihniya uje sehe oyitim olak uje Cristo wichi saserdote shi itso Melquisedec per olak shi olak itso armo heke ye ōryok pwele

oyuhu erahalope. ¹²Ich osdeyo uje olak Porrosht aabo heke tyenij ahakorāhalo yewo per olak nesita uje yeēk shiyokorāha olakpo erze uje oiyiyokorāha olak wapni. Shi olak itso pikihnino ijaabo uje yesh ochuku pork yahpaa ōr pwele uje otaakpe. ¹³Erze uje shi ōr itso pikihnino ijaabo uje yesh ochuku wir uje yērij odiraha Porrosht ahwoso. ¹⁴Per erze uje ich ōr deyo otew erze oposo pisho. Erze uje oyiteētaka shuu imeheeych uje erze uje sehe oyitim olak wir shi par erze uje ōr eyuwosh pork shish ōr prowa nehech ochiraha uje ich om hn ye onahmūr uje ich mihnūwo.

Ich yarhak par ese uje tatim yewo par shuu oym Cristo.

6 ¹Titim olak. Oiyiyokorāha olak Cristo oyuhu erahalo pikaapni per ele ahle sehe oyuhu erahalo ma nehech olak eyuwo itso hnakirbo. Ye nesita oiyiyokorāha olakpo erze uje oiyiyokorāha olakni par uje moymlō kuche mihnūwo hn ye otiislo Porrosht. ²Oiyiyokorāha olakni uje otohirm oso, hn ochibite nahme olak hu eeyo. Oiyiyokorāha olak toy uje topo tyenij ōr ikpo nehe, hn oiyiyokorāha olak uje Porrosht tyenij chibite wir ōr urhuta bahluta etet nehe erze uje otsotiis ire hn shish odechi. ³Kimiji Porrosht nahmūr ich oiyiyokorāha olak kuche ahlo ⁴pork ye eyok pwele yuhu yewo ocheeshi oteeychāha Porrosht erze uje ochuntni uje Jesús ishi ōr hnitewihi Porrosht ahirkite, hn otsahmūr erze uje Porrosht shiyokōr par daabo, hn ochiraha erze uje Porrosht ichibich ishim daabo. ⁵Wir ochiraha uje Porrosht ahwoso ich om hn ochiraha uje Porrosht tyenij shiyokōr nehe chīra lakirbo, ⁶per kimiji wir onoympa Porrosht hn otatim oso itsorz ich ye pwelpe uje shuu ocheeshpo pork wir oshiyokōr shi itso uje ochowishihī Porrosht Ijit krus eeychpo hn oshuu oso ochish majamichihī Cristo. ⁷Nos wir Porrosht aabo shi ōr itso ese hnimich uje iin yuwebo ilote hn shuu jōro tokole par erze uje ochukwēr, hn erze jōro ee de. Nos wir erze uje om tāra Porrosht. ⁸Per kimiji ese hnimich shi wonti tokolihi hn shi pohir wonti tokolihi ich ye jukur. Ich yarhak uje hnimich yinsirc sajir ese hnimich ikiyo hn sēru. Ese hnimich ich shi itso erze oso uje oym Porrosht. ⁹Pishibo watsaklo, oyitim olak oyuhu itsorzike per oyotiis uje olak itso ese hnimich uje shi wonti tokolihi per erze om uje tāra Porrosht tyenij tir olak pork ye otiislo irpe. ¹⁰Porrosht shish shiyokōr uje ich om heke ye dikeype ir ibiyo uje ahakōrloni hn ye dikeype uje ahmūrlo Porrosht aabo yewo hn akashimlo ōr, hn shish ahakōrlo. ¹¹Oyahmūr uje kal olak nohmir nohmir shish shiyokōr uje Porrosht sahmūr nehech terihi uhurc nehe hn Porrosht ishim olak ese uje chibitkite. ¹²Heke ye oyahmūrpe uje olak yeēk shuu ire tok per sehe oyuhu eētlo erze uje ye olotiis Porroshtpe hn ye atarāhalo nehech Porrosht ishim olak erze uje chibitkite.

¹³Uje Porrosht chibite lahwoskite tatim Abraham ich nīhyok uje yeēk ma dich je Porrosht par shuu imeheeych uje ir ahwoso ich ūru heke

Porrosht shi eyucha ire uje tatim Abraham ¹⁴im: —Ich yok uje titim owa uje tiyuhu pahwoso omoho owa hn tuu oso okihniya uje otāra owa nehe.— ¹⁵Heke Abraham ye tarāhape ese uje Porrosht chibite lahwoskite par ishim ire nehe nehech terihi ishirīt hn ishim ire. ¹⁶Uje oso ochibite lahwoso par uje sehe oniyokōr kuchit ich ochiyuhu yet ir iich uje ich ma dich je ōr par uje oshuu imeheeych uje ōr ahwoso ich ūru. Uje ochiyuhu yet ir iich oshuu itsorz ich oym uje oshiyokosye. ¹⁷Porrosht sehe duhu ma imeheeych uje ich ūru erze uje chibite lahwoskite par ishim ōr heke Porrosht eyucha ire uje tatim ōr. ¹⁸Erze kuche osiyer uje ye duhu kināhape wichi ire hn ir ahwoso heke ich imeheeych uje ye Porrosht nehnyēr ōrpe. Eyok uje ye yotiis Porrosht ich yirahalo uje eyok owich de ire ahir. Eyok aho kiis pork tatim eyok erze kuche uje osiyer par shuu yirahalo uje eyok owich de ire ahir. ¹⁹Yirahalo erze uje Porrosht tata ich ūru. Eyok ye yotiispe erze ahwoso uje Porrosht tata heke ye eyok koswāhape per eyok itso pohorrza uje ankla sontew par uje ye tīr lekityope. Ese uje itso eyok ankla tēhi wahacha poōrc templo ehēt bortisht pit uje iich otsii kortina uje Porrosht de. ²⁰Wapkite Jesús iyebe tīr wahacha par sitsēr ese dehet uje tīr Porrosht par uje shuu eyok owich de Porrosht ahir pork wichi masaha par saserdote uje ich dichpa hn yelij nihna ire. Wichi saserdote shi itso Melquisedec.

Jesús wichi saserdote shi itso Melquisedec.

7 ¹Ese Melquisedec wichi reyihichis dit Salem. Wichi saserdote uje teeychāha Porrosht uje ich ma dich. Abraham hōr ohno otatskīrkite erze reye uje ich okihniya hōr ohyerptoso hn otserz ōr. Uje Abraham cheeshpo hn chishihi Melquisedec dehet pehet hn Melquisedec chiyuhu lahwoso omoho ire. ²Abraham nos sehek erze kushjāro uje serz shuu po dye hn ishim Melquisedec nohmet. Ese pit nohmet uje ishim ire iich otsii dyesmo. Ese Melquisedec ir iich tata uje ire rey uje shish shiyokōr uje ich om. Wichi reyihichis dit Salem hn Salem tata uje ōr aho kiis heke wichi rey uje shuu ōr aho kiis. ³Wichi nihyok ir deych hn nihyok ir data hn ye ir poruwīrsh. Shish ir ikirīt de. Nihyok webich osht hn nihyok uhurzoshst per wichi shi itso Porrosht Ijit. Wichi shish saserdote. Yelij nihna ire. ⁴Uhu olak eyuwo tisīr uje ese Melquisedec wichi dichpa. Eyok porokkite Abraham sehek erze kuche uje serzkite shuu po dye hn chishew ese nohmet uje iich otsii dyesmo hn ishim Melquisedec. ⁵Shi israel oso uje otāra Leví wir uje omasaha par Porrosht ibiyo uje iich otsii saserdote. Erze ley uje Moisés chichewkite tata uje oso tyenij otsehek erze uje otserz hn oshim nohmet erze Porrosht ibiyo uje ōr iich otsii saserdote hn wir ōr ihnapsoye. Nos otāra Abraham ⁶per Melquisedec ye tāra Levipe per Abraham sehek erze uje serz hn ishim ire nohmet uje iich otsii dyesmo. Porrosht chibite lahwoskite uje tyenij ishim Abraham

kuchẽrk per Melquisedec ma dich je Abraham hn Melquisedec chiyuhu lawhoso omoho Abraham. 7Ich imeheeych uje shi ese uje ich ma dich pwele chiyuhu lahwoso omoho ese yet. 8Erze oso uje otsorz kuche oshim dyesmo erze uje otãra Leví, hn erze uje otãra Leví shish otoy itso eyok. Per Abraham ishim dyesmo ese Melquisedec. Otata uje Melquisedec shish ika. 9Erze israel oso oshim ir dyesmo erze uje otãra Leví. Uje Abraham ishim Melquisedec dyesmo ich eyok pwele yẽrza uje Leví ishim toy 10pork uje Abraham chishihi Melquisedec dehet pehet ich ehn yahpaa Leví tãra Abraham petikkite.

11Porrosht shuu oshiyokõr debiyo erze uje otãra Leví. Erze ibiyo iich otsii saserdote heke nos ishim israel oso erze ley uje Moisés chichewkite. Kimiji erze saserdote hn erze ley doshi eyok hnitewihi Porrosht ahir ẽich inaapo heke Porrosht shuu Cristo tirẽtkite par masaha saserdote itso Melquisedec? Ese Melquisedec ye tãra Leví hn Aaronpe. 12Kimiji Porrosht nos nontew erze saserdote õr ibiyo hn dibite saserdote yet uje ir ibiyo kinãho ich Porrosht tyenij shuu erze ir ley kinehe toy. 13Nos wir saserdote otãra Leví per Cristo ye tãra irpe. Asa weeta uje Cristo tãra ye saserdõtirsh uje ochish obiyoho altar. 14Ich imeheeych uje eyok frhich tãra Judá. Moisés ye tatim erze israel oso uje erze saserdote otãra Judá. 15Ich imeheeych uje erze saserdote õr kinãho pork saserdote ahlt de uje ich shi itso Melquisedec. 16Cristo masaha par saserdote per ye ley dibite irpe. Wichi masaha par saserdote pork yelij nihna ire heke ir ukurbo de. 17Porrosht ahwoso tata uje Porrosht tatim Cristo im: —Tuu amsaha par saserdote uje yelij nihna ire. Owa saserdote shi itso Melquisedec.— 18Uje Porrosht tata shuu itsorz ich iim erze ley uje iler pork ye ir ukũrbirsh hn ye jukur 19pork erze ley uje Moisés chichewkite ye doshi eyok hnitewihi Porrosht ahirpe. Per Porrosht shuu Cristo ishi eyok hnitewihi dahir hn shuu eyok owich de. Heke eyok pwele yitir Porrosht ahir. 20Porrosht tata shuu urpa uje chibite Cristo par saserdote. 21Nos wir oso uje omasaha par saserdote shi ley wate uje chibite õr, per Cristo masaha par saserdote pork Porrosht tata shuu urpa uje chibite lahwoso tatim Cristo im: —Yok Porrosht. Tibite pahwoso hn ye tuu peyuwo tisir kinaha nehe. Owa saserdote uje yelij ehna owa.— 22Heke Jesús shuu yakaha erze uje Porrosht tata uje eyok owich de ire ahir per erze saserdote yewo ye õr pwele oniyokõr oduhu ilorzpe. 23Nos wir saserdote uje otãra Leví tyenij okihniya pork wir shi hnakirbo heke shi otoy hn yet tyenij masaha owich. 24Per Jesús yelij toy heke ye nesitpe uje saserdote yet masaha owich. 25Heke Cristo pwele tibey erze uje ye olotiis irpe par uje shuu õr owich shish de Porrosht ahir pork ire shish ikirit de par sapur Porrosht par õr ire. 26Ich om uje Jesús wichi eyok saserdote uje ich dichpa. Ire yelij niyokõr uje mihnuwo, hn yelij duhu yeek niyokõr uje mihnuwo, hn ye kuche mihnuwo chihni ire ehette. Wichi de Porrosht ahir dukuhlehe

erze uje oshiyokōr uje ich mihnūwo. Wichī ma dich je nos wir kuche uje de Porrosht ahir wahacha poōrc. ²⁷Antni erze saserdote ōr bahuwo shish oshuu loshipo par ōr ire wap pork oshiyokōr uje ich mihnūwo hn oshuu loshipo toy par erze oso uje oshiyokōr uje ich mihnūwo. Per Cristo yelij duhu loshipo par ire pork yelij niyokōr uje mihnūwo. Wichī ishimihi ire par ishi oso ōr hnitewīhi Porrosht ahir hn ich ye niyokōrpo petik nehe. ²⁸Erze oso uje omasaha par saserdote ōr bahuwo shi omasaha pork ley tata. Wir oshiyokōr uje mihnūwo itso erze oso yewo. Ich osdeyo uje asa ley de hn Porrosht chībīte lahwošo shuu ūrpa uje ir Ijīt masaha par saserdote. Wichī yelij niyokōr kuche mihnūwo hn yelij nihna ire.

8 ¹Nos wir erze uje oyitīm olakike shi oyitīm olak uje eyok Irhīch ich dichpa heke sakaha wahacha poōrc Porrosht waāchta. Ir ibiyo iich otsii saserdote. ²Wichī chish obiyoho ese tabernakulo pisht uje de poōrc. Eyok Irhīch shiyokōr ese tabernakulo uje de poōrc, ye hnakirbo oniyokōrpe. ³Erze saserdote ōr bahuwo ōr ibiyo wir par oshimihi Porrosht erze kuche uje oso otōhwa hn ōr ibiyo toy wir par oshuu loshipo par erze ōr kuche mihnūwo bahat uje oshiyokōr. Jesucristo wichī saserdote heke tyenij ishīm Porrosht kuchēr̄k toy. ⁴Kimijī Jesús ehn chīhi ele hnimich ich ye wichī saserdotepe pork saserdote ode lika hnimich. Wir par oshimihi Porrosht erze kuche uje oso otōhwa shi itso uje erze ley tata uje Moisés chichewkite. ⁵Erze saserdote shi ochishew obiyoho ese tabernakulo ehēt uje shi itso ese tabernakulo pisht uje de wahacha poōrc. Yīraha uje itsorz pork ese tabernakulo uje de lika hnimich shi oshiyokōr oshuu itso ese uje de poōrc pork uje Moisés sehe duhu oniyokōr ese tabernakulo hn Porrosht tatīm ire im: —Uhu oniyokōr oduhu ilship ese uje tokowa owa wahacha kojach eeychhna.—

Cristo ir ibiyo ma bale je erze saserdote yewo ōr ibiyo.

⁶Titīm olak. Cristo ir ibiyo uje shiyokōrīhi wahacha poōrc ich ma ukurbosh, ye ilo erze saserdote ōr ibiyo uje oshiyokōrīhi ele hnimich. Nos wir Porrosht ahwoso ich ūru per erze ahwoso ahlo uje chībīte par shuu Porrosht ehēt kiisīhi eyok wir ich ma ihīrtso, ye ilo erze ahwoso uje chībīte par erze israel oso wapkite. ⁷Porrosht chībīte lahwošo uje ich om per ye oso ōr pwele oniyokōr uje tata heke chībīte ahwoso ahlo. ⁸Porrosht umo uje shish oso onāha ir ahwoso uje ire chībītīte heke Porrosht ahwoso tata im:

—Eyok Irhīch sole: “Deeych yet nehe hn tibīte pahwoso ahlo par erze israel oso hn erze judea oso. Erze israel oso otsehek irni hn yewo ode norte heke ochikēra iich otsii israel oso hn erze yewo ode sur heke ōr iich otsii judea oso.” ⁹Eyok Irhīch sole: “Erze pahwoso ahlo uje tyenij titīm ōr ye ilo erze pahwoso uje titīm ōr poruwo wishkite. Titīm ōr uje ehn tiyuhu orīhichis egipto oso ōr hnimich shi itso uje tishew ōr hme hn takahi

õr. Ich tibite pahwoso òrkite per òr ire ye oniyokõrpe uje titim òr heke tokoym òrni.”¹⁰ Hn eyok Irhìch sole: “Tibite pahwoso titim erze israel oso tuu itsorz nehe. Tibite yok ley òr hu tuu ochiraha hn tuu itso uje tichew tibite òr aho. Tuu ochii yok ir Porroshtìhi hn wir piiso.¹¹ Deeych yet nehe hn tyenij nos ochiraha yok heke nìhyok yeèk uje shiyokoràha yewo hnii uje oshiyokoràha leshibo par uje shuu ochiraha yok. Tuu pikìhnino ochiraha yok hn tuu erze uje ich òr deyo ochiraha yok toy.¹² Yok perdonar òr erze kuche mìhnūwo uje oshiyokõr hn ich ye peyuchape.”—

¹³ Uje Porrosht chiilehet hn chibite lahwoso ahlo ich shiyokõr shuu itso uje ye jukur erze ir ahwoso uje tata wapkite. Ich imeheeych uje wir ilaro heke ihirle ich sihna ire.

Tabernakulo uje de hnìnichkite hn ese uje de poõrc.

9 ¹ Oyitim olak. Uje Porrosht chibite lahwoso wapkite ich chibite ir ley uje tyenij oshiyokõr par uje oteeychàha ire hn shuu oshiyokõr ir tabernakulo toy par uje oteeychàha ire. ² Ese tabernakulo oshiyokõr ochìra karpit oshuu aho osiyer. Ese ehèt webich osht kuchit de shì par uje ochibite nampyon eeych hn nemest dechi toy uje ochibite pan uje oshimìhi Porrosht. Ese owich iich otsii Santo. ³ Bortisht de ese ehèt uje shuu aho osiyer hn ese bortisht pìt iich otsii Santísimo. ⁴ Kejunt uje ich berzak dechi uje iich otsii altar. Ese altar ochibite oro eeyo shì itso uje ochùshur. Wichì par uje otserùhu kuche uje aat ehmuuj. Kejunt yet dechi toy uje iich otsii owich par Porrosht ahwoso. Wichì kejunt oro de eeyo itso uje ochùshur, hn jarta dechi ese kejunt ehèt uje oshiyokõr ochìra oro. Maná de asa jarta ehèt. Aarón ir itilta uje pohnakite hn eesh dechi ese kejunt ehèt toy. Erze kojano po uje itso tabla dechi ehèt toy. Porrosht chichew chibite ir ley erze kojano po eeyokite. ⁵ Ese kejunt ir uhurrza shì oro hn oshiyokõr kuchèrk uje iich otsii kerubines ochìra oro uje iyehetìhi asa uhurrza eeych. Òr ìhyo terihiye. Wir Porrosht ir kerubines, hn asa uhurrza wichì owich uje sosir oso ishi òr hnitewìhi Porrosht ahìr. Ele ahle ich ye òryok pwelpe par oyiita ma erze kuche. ⁶ Uje erze israel oso ochimìt ese tabernakulo uje oshiyokõr ich aho osiyer de ehèt. Erze saserdote shish omasaha ese ehèt webich osht par oshiyokõr debiyo, ⁷ per shì erze saserdote òr bahlut pisht pwele masaha ese ehèt yet uje dechi pìt. Shì deeych nohmira kal àyt ich masaha wahacha hn shì uje tòhwa kuche armista par ishi erze ir kuche mìhnūwo ir bahat uje shiyokõr hn par ishi erze israel oso òr bahat uje ye odìrehepe kimìji mìhnìk per oshiyokõr. ⁸ Heke Porrosht Ichibich shuu imeheeych uje nìhyok ye oso òr pwele otaachìhi Porrosht ahìr pork bortisht shuu ese tabernakulo aho osiyer hn sontew òr. ⁹ Nos wir erze uje titim olakìke wir shì titeèta ele ahle uje Porrosht chibite lahwoso ahlo. Antni erze kuche uje oshimìhi Porrosht par oteeychàha ire hn erze loshipo uje oshuu par òr kuche mìhnūwo

bahat uje oshiyokōr wir ye pwele churhū ōr ahope pork shish ochuuna uje oshiyokōr uje ich mihñūwo. ¹⁰Wir shi ley uje tata erze poso uje oso ōr pwele otew hn erze uje ōr pwele oho hn tatim ōr par uje otisoho awit. Wir shi ley uje Porrosht shuu oso oshiyokōr nehech terihi ishirīt uje chibite lahwoso ahlo.

¹¹Cristo tirētkite heke ele ahle wichi saserdote uje ich dichpa wahacha poōrc par ishim Porrosht aabo erze uje ich om. Wichi chish obiyoho ese tabernakulo uje de poōrc uje ich ma om uje ye oso oniyokōrpe. Ese tabernakulo ye ĩrmo ospe. ¹²Cristo masaha ese tabernakulo ehēt per ye dosim Porrosht kabirt armista hn ye dosim wōjit armistape. Shi ishim narmista hn yelij deeshpo masaha par shiyokōrpo. Wichi ishi eyok hnitewihi Porrosht ahirkite heke eyok ikirīt de uje yelij nihna ire. ¹³Erze wōjo itokohlo ir armitsi hn erze kabir ir armitsi uje saserdote otsita oso ochĭra, hn asa wōjita uje otsēru uu ir piitsit ochimchaha awit hn otsita oso ich shuu ōr owich om par uje ōr pwele omasaha templo patikit ehēt. ¹⁴Mahn Cristo yelij niyokōr uje mĭhnik. Porrosht ichibich de ire ehēt hn shuu ishimihī ire par uje oshuu oshuu toy par ishi ōr hnitewihi Porrosht ahir. Ir armista ich ma ukurbosh je nos wir loshipo ir armitsi par uje ishi erze kuche mihñūwo ir bahat uje yiyokōrlo par uje yiyokōr uje Porrosht sahmūr. Porrosht wichi shish ika.

¹⁵Heke Jesús shuu Porrosht ehēt kiisihi eyok pork shuu yakaha erze ir ahwoso ahlo uje Porrosht chibitkite. Heke erze oso uje Porrosht chihla ōrkite ich ōr ikirīt de uje yelij nihna ire pork uje Jesús toy ich ishi ōr hnitewihi Porrosht ahir. Wir oshiyokōrni uje ich mihñūwo pork ye oniyokōrpe erze ley uje Moisés chichewkite. ¹⁶Uje yeēk shiyokōr ir hutita chibite lahwoso uje tata uje toy nehe hn ese yet hnoy ir kushjāro per ye pwele doype erze kushjāro nehech nos ochiraha uje wichi toy. ¹⁷Asa hutita uje chichew par uje ishim yet ir kushjāro ich ye jukur uje ehn ir ika, per uje toy ich wichi pwele hnoy ir kushjāro uje ishimni. ¹⁸Heke erze ahwoso uje Porrosht chibite wapkite shi uje oshuu loshipo oshuu toy hn ir armitsi noshi ich ir ahwoso ukurbosh. ¹⁹Uje Moisés nos tatim erze israel oso erze ley ich shuu wōjo hn kabir hn shuu ir armitsi ĩya yēr hn shuu awit ĩya hn chipeēsa obeje wesho ese phich uje iich otsii hisopo hn sakehe asa armista ehēt hn sita pĭkaap asa hutita waa je ley de hn nos sita wir oso shuu pĭkaap. ²⁰Moisés tatim erze israel oso ĩm: —Ana armista shuu olak owich om par ahakōrlo uje Porrosht tatim olak.— ²¹Moisés sita pĭkaap ese tabernakulo chĭra armista toy hn nos sita erze kuche uje ochĭra par oteychāha Porrosht. ²²Erze ley uje Moisés chichewkite tata uje nos wir kuche uje ochĭra hn oteychāha Porrosht wir uje sita chĭra armista, shi sohmĭramo de uje ye ditape. Kimiji nĭhyok kuche uje oshuu oshuu toy hn ir armista noshi par ishi bahat ich ye perdontikish par erze kuche mihñūwo uje oshiyokōr.

Cristo tokite par ishi oso ör hñitew.

²³Titim olak. Ese tabernakulo hn erze kuche uje de ehēt wir shi itso uje de poōrc heke tyenij sita chīra armista par uje oteeychāha Porrosht. Per ese tabernakulo pisht hn erze kuche uje de ehēt de wahacha poōrc heke nesita kuchit armista uje ich ma om je loshipo armista. ²⁴Cristo ye masahape ese tabernakulo uje oso oshiyokōr. Wichi shi itso ese tabernakulo pisht uje de wahacha poōrc. Cristo masaha poōrc hn tīr Porrosht ahir par uje takashim eyok. ²⁵Uje kal terihī āyt ich ese saserdote ör bahlut pisht uje de lika īrmo hnoy armista seya tabernakulo ehēt. Asa armista ye saserdote ir armitsape, per Cristo hnoy narmista seya tabernakulo pisht ehēt shi shuu owich nohmira. Ye doype kal āyt duhu ire ilo ese saserdote ör bahlut pisht. ²⁶Kimiji kal āyt Cristo doy narmista deya tabernakulo ehēt itso ör uje oshiyokōr ich shish Cristo tyenij toy kal āyt shiyehē uje shiyokōr irmōkīte nehech ele ahle per ire ye niyokōr duhu ilorzpe. Per uje terihī ishiritkīte ich Cristo tīrēt shi shuu owich nohmira hn ishimihī ire par uje oshuu oshuu toy hn ishi ör hñitewihī Porrosht ahir. ²⁷Porrosht chibite uje nos wir oso shi owich nohmira uje otoy hn otīr Porrosht ile ikich nehe hn wichi teychim ör kimiji oniyokōr uje mihñūwo o kimiji ye oniyokōrpe. ²⁸Heke Cristo ishim ire par uje oshuu oshuu toykite shi owich nohmira par uje ishi oso ör hñitewihī Porrosht ahir ich okihniya. Wichi tyenij cheeshpo nehe per ye par uje ishi ör hñitewpe. Shi tyenij cheeshpo nehe par uje hnoy erze uje oyem ire.

10 ¹Erze uje asa ley tata waa je Moisés chichewkite wir shi siteēta per erze uje ich ūru iyehe erze ley nēr. Erze uje iyehe nēr wir uje ich ihirts pisho uje Cristo shiyokōr. Kal āyt ich erze ley shuu oshuu loshipo par uje ishi ör hñitewihī Porrosht ahir per yelij doshi ör hñitew erze uje sehe oditīr ire Porrosht. ²Kimiji loshipo armitsi doshi ör hñitewihī Porrosht ahir ich ye nesitpe uje erze israel oso ör saserdote shish oshuu loshipo kal āyt par ör. Kimiji erze loshipo ir armitsi doshi ör hñitew ich ye onuunape uje oshiyokōr uje ich mihñūwo, ³per kal āyt shish shuu loshipo heke shi shuu ör eyucha erze mihñūwo uje oshiyokōrni ⁴pork erze wōjo itokohlo ir armitsi hn kabir ir armitsi wir ye pwele doshi ör hñitewihī Porrosht ahirpe. ⁵Heke uje Cristo tīr irmōkīte hn tatim Porrosht im:

—Ye ahmūrpe uje oshuu loshipo par oteeychāha owa hnii uje oshimihī owa kuche, per asim yok piyūhurrzani uhu itso oso par uje tokoshi ör hñitewihī ahir. ⁶Ye ahmūrpe erze loshipo uje otsēru par oteeychāha owa, hnii erze loshipo uje oshuu par oshi ör hñitewihī ahir.— ⁷Heke Cristo tatim Porrosht im: —Dii Porrosht hmeychim, tikirēt titīr īrmo par tiyokōr uje ahmūr. Uhu ochichew ahwosni hn tata uje tyenij tiyokōr tuu itsorz.—

⁸Uje Porrosht ahwoso tata uje ye Porrosht nahmūrpe erze loshipo uje oshuu par oteeychāha ire hnii erze kuche yewo uje oshimihī ire hnii erze

loshipo uje otsēru par oteeychāha ire hnii erze loshipo uje oshuu par oshi ōr hñitewihi ire ahir, per wir shi oshiyokōr pork ley tata, ⁹heke Cristo tata im: —Hmeychim, Tikirētni par tiyokōr uje ahmūr.— Uje tata shuu itsorz ich shuu ye jukur erze iluu iler par uje iluu ahle masaha owich. ¹⁰Jesucristo shiyokōr uje Porrosht sahmūr heke shuu eyok yomsaha par Porrosht aabo pork wichi ishimihi ire oso par uje oshuu oshuu toy hn ishi eyok hñitewihi Porrosht ahirkite shi owich nohmira. ¹¹Nos wir israel oso ōr saserdote shish oyehetihi wahacha templo patikit ehēt par oshuu loshipo par uje ishi oso ōr hñitewihi Porrosht ahir per erze loshipo uje oshuu ye doshi ōr hñitewihi Porrosht ahirpe. ¹²Per shi owich nohmirship Cristo ishimihi ire erze oso par uje oshuu oshuu toy hn ishi eyok hñitewihi Porrosht ahir. Uje ishikite ich sihna debiyo hn hno sakaha Porrosht waächta pork wichi ich dich toy. ¹³Ele ahle Cristo shi iyem uje Porrosht chibite erze ir imāho ir hme nehe shi itso uje shuu Cristo chibite der ōr eeyo. ¹⁴Shi owich nohmirship uje ishimihi ire oso par uje oshuu oshuu toy hn ishi eyok hñitewihi Porrosht ahir. Uje yomsaha par eyok Porrosht aabo ichii wichi nishii eyok iluu saraāshi nehech uhurc ich eyok iluu shi itso ir iluu. ¹⁵Porrosht Ichibich shuu yiraha toy uje eyok Porrosht aabo pork wichi shuu profet yet tata im: ¹⁶—Eyok Irhīch sole: “Deeych yet nehe hn tibite pahwoso tuu itsorz. Tibite yok ley ōr aho hn tuu ochiraha yok ley shi itso uje tichew tibite ōr eyuwo.” ¹⁷Hn Irhīch tata im: “Ich ye peyuchpe erze kuche mihñūwo uje oshiyokōrni.”— ¹⁸Uje Porrosht perdonar olak uje ahakōrlo erze kuche mihñūwo ich ye nesitpe uje yeēk ishipo.

Porrosht aabo ye otolpe otīr ire ikich nehe.

¹⁹Pishibo watsaklo, titim olak. Porrosht perdonar olak heke ele ahle ich ye yitilape uje yitīr wahacha tabernakulo pisht ehēt uje Porrosht de pork Jesús tooho krus eeychkite hn ir armista noshi par ishi eyok hñitewihi Porrosht ahir. ²⁰Jesús wichi itso dehet ahl̄t uje tīr Porrosht. Ese uje itso dehet ilarc wichi erze ley uje Moisés chichewkite. Ese dehet ahl̄t shuu eyok ikirīt de uje yelij nihna ire. Ese bortisht uje dechi Porrosht ihyuch ehētkite sentii uu pit yet par uje ye oso ōr pwele otīr Porroshtpe, per ese bortisht shi itso Cristo ir yūhurrza. Uje wichi tokite ich shi itso uje chiyuhu ese bortisht par uje oso ōr pwele otīr Porrosht. ²¹Jesús wichi eyok saserdote pisht uje tibey Porrosht ihyuch ²²heke yuko yitīr Porrosht pork ye eyok aho yuhurishpe, hn ye yotiis Cristope pork wichi uje churhū eyok aho hn yapur perdon par erze kuche mihñūwo uje yiyokōrlo shi itso uje yisoho awit uje ich ihīrt. ²³Yiitani uje eyok owich de Porrosht ahir. Ye yukwim hn ye yuhu eyok koswāha Cristo pork Porrosht shish shuu lahwoso yakaha uje chibitkite par uje ishim eyok. ²⁴Tyenij yuhu eyok eyuwo tisīr yiyokōr latikpo par uje ma yahmūrloye hn par uje

ma yiyokōrlo uje ich om. ²⁵Ye yukwimlo uje yakishlo eyok owich par yeeychāhalo Porrosht. Ode uje oshuu yakaha ire uje ye otakisho lawich nehech oym. Ye ahakōrlo uhulo ilorz. Ich ma om uje akashimloye par uje olak duurapo pork ich imeheeych uje yej terihi ese deeych uje eyok Irhīch cheeshpo nehe heke ich tyenij ma uhu olak duurapo.

²⁶Per kimiji eyok yeēk diraha erze uje ich ūru per shish shuu erze kuche mihnuwo yakaha ire ich nīhyok yet par ishi ir hnitewihi Porrosht ahir. ²⁷Shi tyenij iyem par uje tīr Porrosht ile ikich nehe hn sepyēr ire. Wichī ich yarhakpa. Tyenij tīr asa urhuta bahluta ehēt nehe uje Porrosht chīmchaha namāho. ²⁸Kimiji hnakirbich sowe asa ley waa je Moisés chichewkite hn kimiji ōr osiyer o ōr tre uje otata uje wichī iyuwe asa ley ich tyenij oshuu oshuu toy, hn ye latik nuuna uje wichī losuhlaap. ²⁹Per kimiji hnakirbich ditak Porrosht Ijīt Jesús ich ma mīhnik uje tyenij tīr ire pork wichī chibite uje ye jukur uje Cristo tooho krus eeychkite hn ir armista noshi par ishi ir hnitewihi Porrosht ahir. Wichī chiyuhu lahwošo mīhnuwōho Porrosht Ichibich uje takashim oso par oshiyokōr uje Porrosht sahmūr. ³⁰Yirahalo uje eyok Irhīch shish shiyokōr uje tata. Wichī tata im: —Uje yeēk niyokōr mīhnikīhi olak ich ye eētlo ire. Yok tyenij tiyuhu olak bahat.— Hn Porrosht ahwošo tata toy im: —Eyok Irhīch teychīm laabo kimiji oniyokōr mīhnuwo o kimiji ye oniyokōrpe hn sepyēr yeēk uje shiyokōr uje ich mīhnuwo.— ³¹Ich yarhakpa par erze uje oshiyokōr uje ich mīhnuwo uje otīr Porrosht ile ikich nehe pork wichī ika hn tyenij sepyēr ōr.

³²Olak eyucha uje wapni hn ēntlo Porrosht ahwošo hn amsahalo par olak ir aabo. Kuche mīhnuwo ich kihniya tīr olak per shish olak ewenta. ³³Deeych yetni hn ode uje oshuu dit oso otakisho lawich par uje oshuu wir oloter olak nohmiramō. Deeych yetni hn olak de wir ōr ahir erze Porrosht aabo yewo uje wir oloter ōr. ³⁴Olak ich eeniloni uje wir ōr losuhlaabo erze uje ode karsel ehēt, hn uje oso ohnoy olak kushjāro ich shish olak ayla pork erahalo uje olak kushjāro de wahacha poōrc uje ich ma ihirts pisho hn ye taatpe. Wir ye latik pwele uje diyuhu olak ahir. ³⁵Heke ye otiislo uje Porrosht tyenij ishīm olak erze premyo uje ich deyo nehe. Kimiji otiislo ich moymlo erze olak premyo hn pyerte. ³⁶Olak tyenij nos olak ewenta erze kuche mīhnuwo uje tīr olak par uje olak pwele ahakōrlo uje Porrosht sahmūr hn Porrosht tyenij ishīm olak nehe erze uje chibite lahwošni par ishīm olak. ³⁷Porrosht ahwošo tata shuu itsorz: —Ich yej terihi uje Cristo tyenij cheeshpo nehe hn ye duhu yilkamihi irpe ³⁸per ese uje ir owich de pahir, ir ikirīt de pork ye lotiis yokpe. Kimiji deeshpo dotiis yok ich ye yok aylihi irpe.— ³⁹Per eyok ye eyok ilo erze uje ochunt per ocheeshpo otsotiis Porrosht. Wir tyenij otīr urhuta bahluta ehēt nehe. Eyok ich eyok itso erze uje ye olotiis Porroshtpe heke eyok ikirīt de uje yelij nihna ire.

Oso odekite uje ye olotiis Porroshtpe.

11 ¹Uje ye yotiislo Porroshtpe ich yirahalo uje ich ūru erze uje chībīte lahvoskite par ishīm eyok nehe. Wīr yelij yomo per yirahalo uje deeych yet nehe hn ishīm eyok. ²Eyok poruwo wishī ye olotiispe uje Porrosht tatīm ōrkite heke Porrosht tata uje oshiyokōr uje ich om. ³Ye yotiis Porroshtpe heke yirahalo uje shiyokōr nāhu irmōkīte shī chāra lahwoso. Erze kuche uje yesh yeychīmlo wīchī shiyokōr chāra kuche uje ye eyok pwele yomope. ⁴Abel ye lotiis Porrosht petikkite heke ishīm Porrosht kuche uje ich ma om je uje Caín ishīm Porrosht heke Porrosht tata uje Abel shiyokōr uje ich om hn im: —Ir owich de pahīr.— Heke ich imeheeych uje Porrosht sahmūr ese uje Abel ishīm ire. Abel tokite per shish oso ochunt uje ye lotiis Porroshtpe. ⁵Enoc ye lotiis Porrosht petikkite hn Porrosht hnoy ire seya poōrc par uje ye tope. Ochukwi per ye latīk dish ire pork Porrosht hnoy. Uje ehn yahpaa Porrosht doy Enockite ich otata uje Enoc shiyokōr uje Porrosht sahmūr. ⁶Kimīji yeēk dotiis Porrosht ich yelij duhu Porrosht aylīhi ire. Uje sehe yeēk dītīr ire Porrosht ich tyenīj ye lotiis uje ire de hn tyenīj ye lotiis uje Porrosht ishīm premyo erze uje ochukwi ire. ⁷Uje Porrosht tatīm Noé uje tyenīj kīrsyent bahlut tīrēt ich wīchī ye lotiis īrpe. Yelij oso onomo erze uje tyenīj tīrēt tār ōr. Noé shiyokōr asa pohorrza par uje ōr ire ye otope. Shī uje Noé ye lotiis Porroshtpe ich chībīte orhōta uje erze oso uje ode nāhu īrmo ōr īluu mīhnū hn tyenīj otoy. Ir owich de Porrosht ahīr shī pork ye lotiis īrpe.

⁸Titīm olak uje Porrosht tatīm Abraham par shuu iim ese dawich uje ire de par ishīm ese owich yet nehe ich ye lotiis Porrosht petikkite. Uje tokolīhichis ich ye dīraha uje hno tār. ⁹Ye lotiis Porroshtpe heke debuhu wahacha ese hñīmich uje Porrosht chībīte lahvoskite par ishīm ire. Abraham wīchī dīhip kinaha wahacha hn shī debuhu karpīt uut. Ir ijīt Isaac hn ir ahñīmich Jacob odebuhu karpa uulo toy. Porrosht tatīm ōr toy uje tyenīj ishīm ōr ese hñīmich nehe. ¹⁰Abraham shish iyem ese dīt uje Porrosht shiyokōr. Porrosht shuu ese dīt sakaha kojano eeyo ye ilo karpīt uje shī ohnoy. ¹¹Sara itspo ye lotiis Porrosht petikkite heke Porrosht ishīm ir ukurbo par ir ijītish. Uje ir ijīt shūrha ich wate īlarpa. Iyuwe erze ishīryo uje tīmcher ōr aabosh per wate ye lotiis uje Porrosht shuu lahwoso yakaha uje tatīm ire. ¹²Abraham ich īlarpa per aabosh hn oso otāra ire ich okīhniya. Ye latīk pwele tīskēr ōr. Wīr shī ōr itso porrzeebe uje de poōrc hn shī ōr itso hñīmich ukult uje de onoot bahlut wīrc. ¹³Abraham hōr otokite per shish ye olotiispe uje Porrosht tyenīj ishīm ōr ese hñīmich uje chībīte lahwoso par ishīm ōr nehe. Nos wīr ōr ire ye olotiispe shī itso uje omo uje Porrosht ishīm ōr hn ōr ayla. Ōr ire otata uje ōr dīhipo kināho uje ode nāhu īrmo pork ōr owich de poōrc. ¹⁴Uje otata oshuu

itsorz ich ochibite orhōta uje ōr eyuwo tisirīhi ōr owich pisht uje odebuhu nehe. ¹⁵Kimijī oduhu deyuwo tisirīhi ese hnimich uje otokolihini ich ōr pwele ocheeshpo. ¹⁶Per wir oyeem ese owich uje ich ma om je ese owich yet uje otārnī. Wir oyeem ese ōr owich uje de poōrc heke Porrosht ye pookpe uje wir otata uje ire uu ōr Porrosht. Wīchi shiyokōr ditni par ōr ire. ¹⁷Porrosht sehe duhu Abraham duhu imeheeych uje ye lotiis irpe heke tatim Abraham par ishimihī Isaac ire shi itso uje oshuu loshipit hn otsēru. Abraham de par shuu ese deyjīt nohmiramīt uje Porrosht chibite lahwasni ¹⁸tatim ire uje oso okihniya tyenij otāra Isaac. ¹⁹Abraham chiraha uje Porrosht ukurbo deyo de hn pwele shuu topo ōr ikpo heke shi itso uje shuu Abraham ijīt Isaac ikponi. ²⁰Isaac ye lotiis Porrosht petikkite heke chiyuhu lahwoso omoho deyjo Jacob hn Esaú. ²¹Jacob ye lotiis Porrosht petikkite, heke uje terihī par uje toy hn chiyuhu lahwoso omoho José aabo. Jacob titila detilta hn teeychāha Porrosht. ²²José ye lotiis Porrosht petikkite, heke uje ich terihī par toy hn tatim erze deeyso israel oso par uje ohnoy erze ir debiyo nehe uje otokolihī erze egipto oso ōr hnimich par ochihitsimihī wahacha hnimich uje otīr par odebuhu.

²³Moisés ir deych hn ir data ye olotiis Porroshtpe, heke uje Moisés shurhākite ich otsakis nehech shekurko tre pork ōr ire oteychim ese pikihnint ich ihīrtpa hn ye otola ese reype uje chibite ley par uje shuu oshuu pikihnino. ²⁴Moisés ye lotiis Porroshtpe heke uje ich terihī leherzkite ich ye nahmūrpe uje otata otsii rey faraón ijita ir ijo. ²⁵Ma sahmūr uje iya erze oso uje Porrosht chihla ōr uje oso yewo oloter ōr hn ye nahmūr nōyape erze uje ich ōr ayla uje oshiyokōr uje ich mihnūwo. Wir shi ōr ayla par daalo arhaabo ich ōr dosdarakpo. ²⁶Moisés chibite uje ich ma om iya erze uje ye olotiis Cristo hn ewenta erze kuche mihnūwo uje yewo oshiyokorīhi ōr. Wīchi shuu deyuwo tisīr kimijī ire ewenta erze mihnūwo uje tīr ire ich ma om je erze hnote uje de egipto oso ōr hnimich pork wīchi eyuwo tisīr erze premyo uje Porrosht tyenij ishim erze uje ye olotiis ire nehe. ²⁷Moisés ye lotiis Porroshtpe heke tokolihī ese egipto oso ōr hnimichkite. Ese rey ich sitak ire per Moisés ye tola irpe. Wīchi shi ewenta erze uje tīr ire pork ye lotiis Porroshtpe shi itso uje umo Porrosht per ye latik pwele nomo ire. ²⁸Ye lotiis Porroshtpe heke shiyokōr ese ōr ahamich webich osht uje iich otsii Pascua. Shuu oshuu obeje hn otormīhi armista pwert uhur ujuwo uje otsii marko par uje ese anjel uje shuu ōr aabo webich oso ye duhu wir ōr aabope. ²⁹Erze israel oso ye olotiis Porrosht petikkite heke uje ochikāha asa onoota bahluta waa je iich otsii Mar Rojo ich ochikāha hnimich uje kako. Per erze egipto oso ōr ohyerptoso ōr prowa ochikāha ōr ijīch toy hn nos ōr hmarta. ³⁰Erze israel oso ye olotiis Porroshtpe heke shish ochipeēsa ese dit Jericó daalo syete hn ese moraylt kay uje chipeēsa ese dit. ³¹Rahab wate timcharrza yītoro. Ye lotiis Porroshtpe hn takashim erze israel oso ōr pahnekite heke

ye wate toy petikni nõya erze nanapso uje ye oniyokõrpe uje Porrosht sahmūr.

³²Ye tahmūrpe uje titim olak ma pork ye yok tyempirsh uje titim olak uje Gedeón shiyokõr, hnii uje Barac shiyokõr, hnii uje Sansón shiyokõr, hnii uje Jefté shiyokõr, hnii uje David shiyokõr, hnii uje Samuel shiyokõr, hnii uje erze profeta oshiyokõr toy. ³³Shi pork wir ye lotiis Porroshtpe heke oteye hõr wir dihipo kināho hn otsersz õr. Ode uje ye lotiis Porroshtpe hn shuu omasaha par õr jwe uje oshiyokõr uje ich om. Ye lotiis Porroshtpe heke ishim õr erze uje chibite lahwosni par ishim õr. Ye lotiis Porroshtpe heke sontew erze ilpiyo par uje ye tew õrpe. ³⁴Ode uje ye lotiis Porroshtpe hn otsēhi jwekita waa je ich data, hn erze uje oyuhwo par uje ye ohyerptoso oduhu õrpe onīra õr espada, hn erze uje ye õr ukūrbirsh ich Porrosht shuu õr ukurbo deyo de par uje oteye ochīra namāho. Porrosht ishim erze uje ye lotiis ire õr ukurbo par oshuu erze dihipo kināho õr ohyerptoso otola õr hn oyuhwo. ³⁵Profet yewo odekite uje oshuu topo õr ikpo hn oshim õr dati. Yewo ode uje oso oloter õr. Sehe oduhu onoym Porrosht par uje oym uje oloter õr per ye onoym Porroshtpe heke oloter õr nehech oshuu õr oshuu otoy pork sehe õr ikpo nehe hn otār Porrosht ahir. ³⁶Ode uje ye lotiis Porroshtpe heke yewo ochiyuhu lahwoso mihnuwõho õr hn otsepyēr nohmīramo hn oshiyeru nohmīramo ochīra õr kenena hn ochimchaha nohmīramo õr karsel ehēt. ³⁷Hn ode uje oshuu õr ochīra õr kojano po nehech otoy, hn ode uje ochekshehe õr ochīra õr serusho nehech otoy, hn ode uje oshuu ochīra õr espada oshuu otoy, hn ode uje oshuu otokolihī dīt heke ochūr lekītiyo. Shi oshiyokõr lasuwo ochīra obeje yūhur hn kabir yūhur. Wir ich õr losuhlaabo. Kuche mihnuwo tār õr hn oso oshiyokõr mihnuwõho õr. ³⁸Erze oso uje ode nāhu ĩrmo opoym õr iluu uje om heke oshuu otokolihī lahir. Shi ochinshēhe ire hñimoho lekītiyo uje isa hn ese hñimich uje shi kojano deyo. Odebuhu kojano ile. ³⁹Erze kuche mihnuwo uje tār õr chibite orhõta uje nos wir õr ire ye lotiis Porroshtpe per Porrosht ye dosim õr shichishpe erze uje chibite lahwoskite par ishim õr ⁴⁰pork Porrosht sehe duhu nos yukwiīaloye par uje nos ishim eyok nehe erze uje tatkite. Tyenij shuu eyok iluu itso Cristo ir iluu wap.

Eētlo Jesús.

12 ¹Titim olakike uje erze oso okihniya oshiyokõrkite pork ye lotiis Porroshtpe, heke tyenij yeētlo õr hn yukwimlo uje yiyokõrlo erze kuche mihnuwo uje shish sontew eyoklo par uje eyok pwele yiyokõrlo erze obiyo uje Porrosht ishim eyok shi itso yeēk uje shish iim erze kuche par uje uushi hn serz ese premyo. ²Tyenij olak eyucha uje Jesús shiyokõrkite. Wichi ye lotiis Porroshtpe heke eyok tyenij yeētlo ire. Uje Jesús shuu deyuwo tisir uje deeych yet nehe ich ayłpa pork ishi oso õr

hñitew heke shi ewenta erze kuche mihñũwo uje tĩr irehe krus eeych, hn shi ewenta uje ochiyuhu lahwoso mihñuwõho ire par uje sehe oduhu pook. Ele ahle wichi sakaha Porrosht waächta. ³Heke uhu olak eyuwo tisĩr Cristo. Uje erze oso uje õr iluu mihñũ oshiyokõr mihñuwõho irkite ich shish ewenta, heke ye ermtsirlo hn ye uhu patim olak. ⁴Uje kuche tĩr olak par sehe duhu ahakõrlo mihñũwo ich ye olak ewentpe pork ye olak ilo Cristope uje ewentkite hn ir armista noshi per shish ewenta. ⁵¿Je ekeylo uje Porrosht sakit olak pork olak ir aabo? Porrosht tata im:

—Pijite, ye ompe ebite uje ye latikish uje owa Irhĩch sepyẽr owa. Ye ompe uje moym ire uje sepyẽr owa shuu itsorz ⁶pork olak Irhĩch sahmũr olak heke sepyẽr olak. Kal nohmir uje masaha par Porrosht aap ich shish sepyẽr ire uje shiyokõr uje ich mihñũwo.—

Wir uje Porrosht tata. ⁷Uje Porrosht sepyẽr olak ich tyenij olak ewenta pork olak ir aabo hn sehe duhu ahakõrlo uje ich om. ¿Je pikihñint chihĩ uje ir deyeh ye depyẽrpe uje shiyokõr mihñũwo? Tyenij ir deyeh sepyẽr. ⁸Kimiji Porrosht ye depyẽr olak ich ye olak ir aaboepork shi olak itso pikihñino uje ye deyeh pishtikish pork nos wir pikihñino tyenij õr deyo otsepyẽr õr. ⁹Eyok deyo uje ode nãhu ĩrmo otsepyẽr eyok hn yitililo õr, heke tyenij ma yitililo eyok Deyeh Porrosht. Wichĩ nos õr ichibiyo Deyeh pork nos shiyokõr õr. Wichĩ ishĩm eyok ikirĩt uje yelij nihna ire. ¹⁰Eyok deyo ode ĩrmo hn uje ehn eyok ijaabo otsepyẽr eyok par uje yiyokõrlo uje õr ire otsahmũr, per Porrosht sepyẽr eyok par uje yuhu eyok iluu itso ir iluu uje yelij niyokõr uje ich mihñũwo. ¹¹Uje ehn sepyẽr eyok ich dospa per shiyokorãha eyok par yiyokõrlo uje ich om hn shuu eyok aho kiis.

Ich yarhakpa par erze uje ye onahmũr otẽr Porrosht ahwoso.

¹²Heke titim olak uje shi olak itso yeẽk uje ir hme hn ir itero ich chĩrmtsirpa. Uhu olak duurapo. ¹³Moymlo erze olak iluu mihñũ hn uhu olak ilo yeẽk uje nishii dehet par chikãha pork ode olak eheth uje meytii õr koswãha. Wir shi õr itso yeẽk uje ir hñitita doso hn nesita dehet om par chikãha uje ye duhu ma doso par uje pwele owich ompo.

¹⁴Eyuhu olak par uje uhu olak aho kiisihi nos wir oso, hn shish ahakõrlo uje ich om uje Porrosht sahmũr. Uje yeẽk ye niyokõr uje Porrosht sahmũr ich ye pwele nomo eyok Irhĩch petik nehe. ¹⁵Kimiji olak yeẽk ye Porrosht aappe ich ye pwele tĩr Porrosht petik nehe. Eyuhu olak par akashĩmlo ire par uje masaha par Porrosht aap toy. Kimiji Porrosht aap yeẽk chihĩ olak eheth uje shish shiyokõr uje ich mihñũwo ye uhulo ire ilo erze Porrosht aabo yewo pork wichĩ shi itso pohorrza uro waa je mihñũ uje shuu eebe tãra. Deeyeh yet nehe hn shuu yewo otseẽt ire oshiyokõr mihñũwo toy. ¹⁶Ich om uje hñakĩrbich umuhu nerãhta ahĩr hn ich ompo uje timcharrza umuhu dabich ahĩr per ich mĩhñnik uje ye onõyhi pishye ahĩrpe, shi omuhuye ahĩr. Ich mĩhñnik uje otorãhaye. Ich mĩhñnik

uje timcher timcher ðhyi yēr ahir, hn ich mīhnik uje hnakirbo hnakirbo ðyhiye ahir. Ich mīhnik uje yeēk sahat loshipit, hn ich mīhnik uje yanak ishim ire loshipit par shuu sahat ire. Ich mīhnikpo uje pikihmino hn pikihnine oshiyokorīhiye oshuu itsorz. Ye uhu olak ilo yeēk uje ma sahmūr nāhu īrmo oso ðr iluu heke ye nahmūr Porroshtpe. Wichī shi shiyokōr itso uje Esaú shiyokōrkite pork par ire ich ye latikish kimiji deych diyuhu lahwoso omoho ire o kimiji diyuhu lahwoso omoho ese deyjīt shakaharc. Heke chibehe erze ahwoso oomo oposht shuu pretitl nohmira. ¹⁷Olak erahalo uje deeych yet hn sehe duhu ir deych diyuhu lahwoso omoho ire per ir deych tatim uje ich nīhyok par ire. Esaú ich yerh per ye pwele duhu ir deych ahwoso oomo deeshpe. ¹⁸Olak ye nesita uje etirlo olak ese kojach Sinaí uje olak poruwo wishī otsitīr irkite. Wir ye ðr pwele uje otsakīhir ese kojach petikkite, hn jwekita data dechi ir eeych hn dīhlel data hn ukuhur hn myent data ¹⁹hn yeēk sobita trompeta wahacha kojach eeych, hn Porrosht chiilehet. Uje ochunt ire ich otatim Moisés par uje ye duhu Porrosht keytkēr ðr ire. ²⁰Porrosht tatim erze oso par uje ye olakīhir ese kojach uje ire de. Kimiji yeēk lakahir o kimiji loshipit lakahir ich tyenij oshuu ire ochīra kojano po o kimiji odichew ire onīra asōrza par uje oshuu toy. Otata uje ich ihnpa asa ley heke ye ðr pwele ðr ewentpe. ²¹Ich yarhakpa par oteychim ese kojach uje Porrosht dechi nehech Moisés tata uje ir ikiyo tāra pork ich tolpa. ²²Per par olak ich kināho ye itso erze uje otsitīr ire kojach Sinaikite. Ich shi itso uje aachīhilo Porrosht ahir wahacha kojach uje iich otsiī Sión uje de poōrc. Aachīhilo Porrosht ir dīt Jerusalén uje dechi toy. Porrosht wichī ika. Anjele odechi toy. Otakasho lawich ich okihniya hn ich ðr aylpa uje oteeychāha Porrosht. ²³Nos wir Porrosht aabo ðr iyo de poōrc toy. Wir ðr bahuwo itso yeēk ijīt webich osht. Wir otakasho lawichihichis Porrosht ahir toy pork wichī jwe uje tyenij nos teychim erze oso. Nos wir ir aabo uje otoni ðr ichibiyo dechi toy. Porrosht nos shuu ðr iluu itso Cristo ir iluu. ²⁴Aachīhilo Jesús ahir. Wichī uje ishi eyok hnitewihi Porrosht ahirkite par shuu Porrosht ehēt kiisihi eyok. Jesús ir armista ma om je Abel ir armista. Jesús ir armista shuu Porrosht perdonar eyok per Abel ir armista shi sapur Porrosht par uje sehe diyuhu labahat.

²⁵Abeylshīp olak par uje ye otiislo Porrosht ahwoso uje tatim olak. Nos wir erze uje ye onahmūr otēr uje Porrosht shuu profeta otatim ðrkite, ich Porrosht sepyēr ðr hn nīhyok yeēk uje yuhwoho ir hme. Cristo ma dich je erze profeta uje otsanimirāha Porrosht ahwoso pork erze profeta wir shi hnimich oso per Cristo tāra poōrc. Kimiji ye yahmūrlo yēr uje Cristo tatim eyok ich ma ūru uje ye eyok pwele eyok yuhwoho ir hmepe. ²⁶Antkite uje Porrosht chiilehet ich shuu hnimich telerrza. Porrosht chībit lahwospo im: —Deeych yet nehe hn tuu hnimich telerrza hn poōrc itspo hn ich ye tiyokōr petik nehe tuu ilorz.— ²⁷Uje tata im: —Ich ye

tuu telerrzpope— ich chibite orhōta uje ich tyenij yuwir erze uje pwele telerrza hn wir shi sakaha erze uje ye pwele telerrzpe. ²⁸Heke tyenij yinship Porrosht uje ishim eyok ese owich uje ye pwele telerrzpe hn tyenij yitililo Porrosht hn yeeychāhalo ire ²⁹pork eyok Deych Porrosht wichi shi itso jwekita pork sepyēr erze uje oshiyokōr uje ich mihnūwo.

Titim olak yuhulo inaapo par yinilo Porrosht.

13 ¹Shish tyenij ahmūrloye pork nos olak leshibye pork ye otiislo Cristope. ²Ye ekeylo uje akashimlo Porrosht aabo yewo uje ye erahalo ōrpe uhulo otsakaha olak ihyuwo. Porrosht aabo ode uje oshiyokōr oshuu itsorz ich otakashim anjele per ye odiraha uje wir anjelepe. ³Olak eyucha erze Porrosht aabo yewo uje ode karsel ehēt hn eenilo shi itso uje meylo orīhi karsel ehēt. Olak eyucha erze Porrosht aabo uje yewo oloter ōr hn eenilo shi itso uje oloter olak toy. ⁴Porrosht wichi uje shuu oso ōyhiye ahir heke ye ompe uje uhulo ye jukur. Porrosht tyenij sepyēr erze hnakirbo hn timcher uje ye onōyhi pishye ahirpe, shi omuhuye ahir. Tyenij sepyēr erze uje otorāhaye hn erze timcher uje ōyhi yēr ahir, hn erze uje hnakirbo uje ōyhiye ahir hn erze uje otsahat loshipo, hn erze uje oshuu loshipo sahat ire. ⁵Ye ompe uje ahmūrlo hnote. Uhu olak aho kiis erze kuche uje de olak ahir pork eyok Irhīch tata im: —Shish takashim olak. Ye tokoym olakpe.— ⁶Heke ye eyok koswāhape uje yiita itso uje profet yet tata shuu itsorz im: —Pinsirc takashim yok heke ye tikitila latik uje oso ōr pwele oshiyokorīhi yok.— ⁷Titim olak par uje olak eyucha erze olak bahluwo uje otsanimirāha Porrosht ahwoso otatim olak hn olak eyucha uje oshiyokōr pork wir ye olotiis Porroshtpe. Tyenij eētlo ōr. ⁸Jesucristo ir iluu shish itsye uje wapni nehech ele ahle hn shish itsye nehe. ⁹Ye uhulo yeēk nehnyēr olak hn niyokorāha olak ahwoso kināho. Erze uje elilo ye duhu olak iluu ompe. Shi uje ye otiislo Porroshtpe. Wichi uje shuu olak iluu ma om. Erze uje ochibite uje ye otew erze kuche ērope oshuu deyuwo tisīr uje wir takashim ōr per ye duhu ōr iluu ompe. ¹⁰Erze uje oshuu loshipo hn ochibite altar eeych par uje sehe oduhu doshi ir hnitewihi Porrosht ahir wir otsotiis Cristo heke ye doshi ōr hnitewihi Porrosht ahirpe per ishi eyok hnitew pork ye yotiislo irpe. ¹¹Erze israel oso ōr saserdote bahlut pisht shuu loshipo hn hnoy armista seya ese tabernakulo ehēt par uje ishi ōr hnitewihi Porrosht ahir. Hnakirbo ohnoy erze loshipo otseya dīt nēr hn otserūhuchis. ¹²Jesús itspo, ochiyuhu ire ese dīt ehetskite hn oshuuuuhu wahacha oshuu toy dīt nēr. Ir armista noshi par ishi oso ōr hnitewihi Porrosht ahir. ¹³Heke tyenij yiyokōrlo shi itso uje yukwim ese dīt uje iluu iler de hn yiyakahalo Cristo ahir wahacha ejwert. Uje oso oshiyokorīhi eyok uje mihnūwo ich shish tyenij eyok ewenta shi itso uje Cristo ewentkite. ¹⁴Ye shish eyok owich chihipe ahnūwo duwo uje de irmo. Shi yiyem ese dīt uje tāra

poõrc nehe, ¹⁵heke shish tyenij eyok narim Porrosht pork shish yiita uje ye yotiislo Cristope. ¹⁶Ye ekeylo ahakõrlo uje om hn akashimlo yewo uje kuche nihyokĩhi õr ahir pork Porrosht sahmũr uje ahakõrlo uhulo itsorz pork ich shi itso uje asimihilo Porrosht.

¹⁷Ahakõrlo uje olak bahluwo uje ode iglesya eheth otatim olak pork õr ire shish otibey olak. Deeych yet nehe hn olak bahluwo tyenij otatim Porrosht debiyo uje oshiyokõr. Uhulo õr ayla uje oshiyokõr erze obiyo, ye uhulo õr dosdarak. Uje uhulo õr dosdarak ich ye ompe par olak. ¹⁸Sehe tuu olak orar par õryok pork oyiraha uje ye oyiyokõr uje ich mihnuwope. Sehe shish oyiyokõr uje ich om. ¹⁹Sehe tuu enaha olak uje olak orar apurlo Porrosht par yok toy par uje yok pwele takaashpo shichish tekirihi olak nehe.

²⁰Porrosht wichi uje shuu oso õr aho kiis. Wichi uje shuu eyok Irhich Jesús ikpokite. Jesús wichi eyok bahlut pisht. Wichi itso pastor uje tibey ir obeje hn eyok uje eyok Porrosht aabo shi eyok itso obeje. Wichi tibey eyok pork sõrhir narmistakite hn ishi eyok hnitewihi Porrosht ahir shuu itso uje Porrosht chibite lahwo so par uje Cristo shiyokõr hn yelij duhu kinaha. ²¹Sehe tuu Porrosht dosim olak nos wir kuche uje olak nesita uje om par uje olak pwele ahakõrlo uje ire sahmũr. Jesucristo ishi olak hnitewkite heke Porrosht takashim olak shuu ahakõrlo uje ire sahmũr. Tyenij shish olak narim Cristo. Ich ihĩrtpa kimiji ahakõrlo uhulo ilorz.

Porrosht aabo tyenij oshimye saludo.

²²Pishibo watsaklo, sehe tuu ahakõrlo ahnuwo pahwoso uje tichew tibite ana hutita. Ye pahwoso berzope. ²³Sehe tuu erahalo uje eyok leshibich Timoteo ochiyuhu karsel ehethi. Kimiji taachihĩ pahir shichish nehe hn oyuko oyukwĩyaye oyekirihi olak. ²⁴Tokosim saludo nos wir Porrosht aabo õr bahluwo hn nos wir Porrosht aabo toy. Nos wir Porrosht aabo uje odebuhu hnimich Italia oshim olak saludo toy. ²⁵Sehe tuu Porrosht dosir olak. Shi erze uje tichew tibite ana hutita.